

## **Pauro Korose ezektsa bo ziwatahaka**

Amata, Epaparas tihi ziky Korose ezektsa Sesus harere nitsasoko. Sizubarētsa ihumo sispirikporētsa niyziknaha. Bykyze ustsa myhyriny myrykynahatsa wasanibara ty nisihyriny myryky iwaze nisimiywykynaha, wastuhu Sesus humo batu sispirikpohuk. Iwaze Pauro ispe niy:

— Sesus humo zuba ma tahaktsa atahi zuba mysopyksapybyri humo mymyokzohik —. Deus hyrikoso Pauro tuk niapykyryk iwatahi Deus harere ziwatahaka iwatsahi katsa kino niwatihi Deus soho humo tanymyryky.

<sup>1</sup> Uta Pauro. Kiristu Sesus ziky kzota. Tubabatu Deus kape niy:

— Ikiakta myzubaha bokta. Wasaniha ty sibo tytsaso — niy.

Hyŷ iky. <sup>2</sup> Abaka ikiahatsa bo piwatahaka Timoteo katuk. Atahi mytu ky mytuk Sesus harere bo hyŷ mynakara. Ikiahatsa Korose ezektsa bo tawatahaka. Ikiahatsa mytu kytsa niwatihi Sesus harere bo hyŷ tsimykaranaha ihumo ahspirikporētsa. Uta Deus bo mopamykysoko:

— O Deus myzo. Ikia Korose ezektsa tysipokzitsiki, ahumo sakurētsa moziknaha — my.

Iwa Deus bo ahatsyhyryze mopamykysoko. Iwa Deus nizihikik.

*Pauro Deus bo nipamykysoko, ihumo tsakurēta nikara.*

**3-4** Hawa ikiahatsa Kiristu Sesus harere bo hyŷ tsimykaranaha iwatsahi ihumo ahaspirikporētsa tsimoziknaha. Hawa Deus tyryktsa humo ahamypokzitsiukrētsa anahi botu tsiwabynaha. Iwatsahi katsa ahatsyhyryze Deus bo tsimypamykysokonahaze mykurētsa. Deus Sesus Kiristuzo bo tsimypamykysoikiknaha.

— O Deus Korose ezektsa humo mykurētsa. Ty-nasipokzitsiki — tsimaha. **5** Tapara Sesus soho wasaniha tsiwabynahaze yhŷ tsikaha. Katsaktsa ahape tsimaha:

— Sizubarētsa asahi Sesus humo sispirikpotsa Deus tuk mynapykyryknaha tsimaha, iwatsahi ahaspihikrētsa tsikykaranaha. Ikiahatsa Sesus harere bo hyŷ tsimykaranaha iwatsahi tsimyhyrikosokdanaha zeka Deus tuk tsimypykyryknaha. Ana harere bo hyŷ tsimykaranaha ana humo hi ahaspirikporētsa tsimoziknaha. Iwatsahi Deus tyryktsa humo ahamypokzitsiukrētsa. **6** Deus pahapokzitsiki. Mywatu namypokzitsiki anahumo hi ahahyrinymyrētsa. Deus wasania ty nikaraze tsiwabykynahaze wasani tsikaha. Abaka ustsa kytsa Deus wasaniha piwabykynaha. Ahawatsa Sesus harere bo hyŷ mykaranaha iwatsahi ihumo sispirikporētsa. Deus tyryktsa humo simypokzitsiukrētsa. Deus tuk mynapykyryknaha anahi aha watsa piperykynaha.

**7** Epaparas Sesus soho ababo nitsasoko. Atakta mytuk nikara. Sesus pokzitsiwu tuk tarabaja ziknakara. Kiristu tsumuēhītsa niyze mytsyhyryze nimytsumuēhīkī. **8** Ata hi:

“O Korose ezektsa Sesus tuktua humo tyharape pokzitsinaha. Deus hyrikoso situk

mynapykyryk iwatsahi Deus tyryktsa humo simypokzitsiukrētsa” — niy.

<sup>9</sup> Ana tsiwabynahaze ahatsyhyryze Deus bo zik-napamykysokonaha. Katsa ahatsyhyryze Deus bo tsimypamykysokonaha:

— O Deus Korose ezektsa mytukytsa tysihyrinymyry. Hawaha mozurukunaha humo tysihyrinymyry. Imysapybara sibo tsiwatawy. Aokze wasaniha humo tysihyrinymyry. Ahyrikoso mysihyrinymyryky iwatsahi hawaha humo mozurukunaha zeka mytsaty maha — tsimaha. Ispe tsimaha:

— O Deus hyrikoso pahahyrinymyryky — tsimaha. <sup>10</sup> Iwa zeka ihyrinymyrytsa hyŷ tsimykaranaha zeka hawa ha sa Deus mozihikik tsimykaranaha. Myzibyituhukutu mypehakatsa ahahumo tsakurēta. Hawa haty tsimyzurukunaha zeka tsakurēta. Kytsa kino niwatihi tysipokzitsikinaha. Iwa tsimyzurukunaha Deus soho tsipinymyrytohinaha.

<sup>11</sup> Iwatahi Deus bo mopamykysoko:

— O myzo ikia Korose ezektsa ahumo sipunihikrētsa moziknaha. Ikia zuba tsapunihikrēta. Ikia tsamysapyrēta iwatahi tysipunihikwyky. Iwaze sipunihikrētsa moziknaha. Kytsa mysimyijakaranaha zeka tysibetesa. Sinini mykarananahaze ahumo siakubyrisorokrētsa — my iwa Deus ahatsyhyryze mopamykysoko my. <sup>12</sup> Deus myzo mypehakatsa my. Okoroze kywaha tisapyrēna bo iktsa tsimaha. Katsaktsa mypehakatsa harere bo hyŷ tsimaha zeka kytsa watsa tisapyrēna bo iktsa maha my. Ikiahatsa Deus tyryktsa tsimoziknaha.

Tatyryktsa mysipokzitsiki. Amy isapyha piperyky iwaze hi ikiahatsa bo nyny my, ana hi taperyky. Ahakuhuktsa. Deus pe tsimaha:

— O Deus ikia zuba tsamysapyrēta. Ikia humo ka mykurētsa. Katsa ikia tyryktsa tsimoziknaha. Mykurētsa tsimoziknaha — my.

<sup>13</sup> Satanas batu imysapy. Kytsa papatu ituktsa imysapybara ty nikaranaha iwororobara siak-parawy unata kywaha my. Ityryktsa simysapybyitsa mykaranaha. Imysapybyikia ty mykaranaha anatyhi ityryktsa mykaranaha. Deus babata zuba mymybetesaka iwatsahi Satanas tserekeknaha. Abaka Satanas harere bo ba ma tsimaha. Deus tse harere bo zuba hyŷ tsimynakaranaha. Deus tse zuba myhumo tsimypokztsiarēta. Atahi namybetesa. <sup>14</sup> Jesus tazo bo mymyoktyhyryk. Ni-hyrikosokdaze Deus mysapybyri ihumo nimyokzohik. Abaka Deus okzeka wasani niyzik iwatsahi mykurētsa hŷ.

### *Kiristu myhyrizikwy babata my.*

<sup>15</sup> Nanabyi isuknihibyize ba amy tohi bo zikzonaha Kiristu ta Deus wata. Kiristu tsinynaha. Deus bo ka ba zikzonaha. Kiristu zuba tsinynaha. Kiristu ta Deus tse babata niy. Estuba zubata itse. Deus nanabyity tysukni ahabyize Kiristuta koikny baktatu ituk ziknapykyryk. Atahi taparakta tu.

<sup>16</sup> Deus nanabyi Kiristu humo nizukniki. Deus bijoikpe mybarawy ahapetuk nizuknina. Nawa ha ty nanabyi bo natanykynaha. Deus Kiristu tuk nizuknikinaha. Nanabyi zinynahabikia mybarawy humo kino niwatihi Deus Kiristu

tuk nizuknikinaha. Bijoikpe iknyktsa Deus tsumuēhītsitsa niwatihi nisisuknize. Wastuhu hyrikoso sapybara niyziknahatsa kino niwatihi Deus hi nisisukni. Deus, Kiristu harapetok sihumo nanabyi nizukniba. Atahi tazo tuk myzubaha nizuknikinaha. Anatyhi Kiristu bo niy, iwatsahi myzubaha Kiristu harere bo yhŷ mykaranaha.

**17** Tapara nanabyi suknihibyize tu Kiristuta tapara kino niwata tu koikny baktatu. Bijoikpe mybarawy iwaha ihumo mynapykyryk. Iwaha hi tasapy eze tu mynapykyryk. Ihumo nanabyi tisapyrēna maha. **18** Sesus Kiristu parakbaha mysiakzo. Sizubarētsa mozumubanahaze iharere piwabynahaze mysiakzoko. Mypehakatsa babata my. Atahi myharek wata. Hawa myharamitsī humo hi mytsaty tsimykaranaha iwa tsimykaranaha katsaktsa Kiristu harere humo tsimykaranaha. Myzubaha hi mynury wata. Iwaze Kiristu tyryktsa iharere bo zuba hyŷ mykaranaha. Atahi Deus tse babata. Nihyrikosokdaze Deus zihyrizikpowyze tsimysapyrēta niyzik. Myzubaha iharere bo hyŷ mykaranaha. Atahi myhyrizikwyrēnikita babata niyzik atahi abazubata niyzik, ba hawa tohi zikzukninaha.

**19** Deus tatuktuka nikara — O katse kawata mozihikik — Kiristu Deus astsatu my.

**20** Mybarawy ezektsa Deus bo ma zikahabyitsa. Sinini ykarawy ezektsa kino niwatihi Deus humo tahakyrikinaha. Iwaze Deus mybarawy ezektsa humo taokaniki iwatatu mahani iokani hyrinymyry iwaze hawa meky watu moziknaha mytsaty nikara. Atahi:

— Katse babata iharapatawyhyta humo pibezenahaze iwaze meky watu mytsaty mykaranaha. Kaharere bo hȳ mykaranaha — niy. Iwa Deus tatuktuka nikara. Mybarawy ezektsa humo mahani iokanihyrinymyry.

*Abaka Kiristu harereziuwytса tsikyziknaha.*

<sup>21</sup> Taparaka Sesus harere bo ma ahabyitsa iwatsahi Deus sukyrytsitsa moziknaha. Ikiahatsa ihumo batu ahakparawy. Iwatsahi hawa sa batu ahasopyksapy ana humo hi mytsaty tsikykaranaha. Hawa sa batu imysapy tsikykaranaha. Deus ahakparawybyitsahi iwatsahi ahamysapybyitsa tsikykaranaha.

<sup>22</sup> Abaka meky watu tsimoziknaha. Deus harereziuwytса zuba tsikyziknaha. Itse babata ahasapyzeky nihyrikosokda iwatsahi itukytsa tsimoziknaha. Iwatsahi wasani tsimykaranaha. Iokzeka tsimyzumunahaze batu ahasikpyby tsimaha. Batu aty tohi ahasoho humo:

— O ikiahatsa batu ahasopyksapy — maha. Ikiyahatsa hi ahamysapyrētsa tsimoziknaha h̄y.

<sup>23</sup> Ikiahatsa hi Deus harere humo tsimyspirikpotohinaha. Iharere bo ka hȳ tynakaranaha. Katsaktsa Deus tuk mywahi tsimynapykyryknaha ana hi taperyky. Ipery humo ahapunihiku ja. Utakta Deus wasania ty motsasoikik anahi kahyriziktsokzawy. Nanabyitaba kytса bo Deus wasaniha motsasokonaha h̄y.

*Pauro Sesus tuktsa nisitsumuēh̄ekik.*

<sup>24</sup> Abaka kakurēta. Ahatsyhyryze sinini mykaratatu kakurēta. Kiristu myzubaha bo sinini

nikaraze. Asaktsa mozumubanahaze iharere piwabynaha sihumo sinini mykara. Asahi Kiristu nury watsa. Iwatahi uta kino niwatihi sinini mykara. Ikiahatsa pokzi Kiristu nury watsa sinini mykara. <sup>25</sup> Deus kape niy:

— Wasaniha ty tytsasokokta. Kytsa Sesus humo sispirikporētsa asahi katyryktsa maha iwatsahi sibo wasaniha tsimytsasoziuku! Katyryktsa tysitsumuēhī — niy. Atahi anaty kabo ziwatowy iwaze hi nanabyitaba wasania ty motsasoziuku.

<sup>26</sup> Taparaka Deus batu harere aha kytsa iharere batu siwabyhy. Deus wasaniha batu aty tohi ty tyhyrinymy. Abaka meky watu. Kytsa Deus harere bo hȳ mykaranaha ihumo sispirikporētsa iwatsahi wasani haty pinymyrykynaha.

<sup>27</sup> Abaka myzubaha iharere piwabyky-naha ana hi Deus mozihikik. Taparaka batu ahahyrinymy abaka wasania ty pahahyrinymyryky. Iharere tisapyrēna, iwatahi myzubaha bo motsasoko. Sudeustsabyitsa bo kino motsasoko. Tapara Kiristu ahatuk ziknapykyrykze batu ahahyrinymyryhu abaka ahahyrinymyretsa h̄y. Deus humo hi ikiahatsa ituk tsimynapykyryknaha nizihikik iwatahi tsakurēta.

<sup>28</sup> Katsaktsa Sesus Kiristu soho tsimytsasokon-aha. Nanabyitaba Sesus soho tsimytsasokonaha. Hawa imysapybara humo maha zeka tysispirikpokonaha. Nawa mozurukunaha zeka mysihyrinymyrynah. Nawa Deus mozihikik iwa mozurukunaha. Tymyi habyitsa tsiksihyrinymyrybanaha. Iwaze Deus okze mozumunahaze atahi:

— O asahi wasani mykaranaha. Kiristu tuk mozurukunaha iwatsahi simysapyrētsa moziknaha — my. <sup>29</sup> Iwatatu utakta mysitsumuēhīkī. Deus tazikwy ty kabo nyny mykara iwatahi ihyriziktsokzawy humo mynakara. Atahi moziktsumuēhīkī, ana humo hi mysihyrinymyryky.

## 2

<sup>1</sup> — O kytsa kaharere tsiwabytoktonahaktsa. Hawa ahatsumuēhīekik, naha hi tsinymyrynaha. Raodisija ezeptsa kino niwatihi asahi Sesus harere bo hȳ mykaranaha iwatsahi ihumo sispirikporētsa, iksitsumuēhīkī. Ustsa kytsa Sesus tuktsa kanyhybyitsa kino iksitsumuēhīkī. <sup>2</sup> Iwatsahi sizubarētsa sipunihikrētsa moziknaha. Tyharape pokzitsikinaha. Kahyriziktsokzawy humo ikiahatsa ahakurētsa tsimoziknaha. Tsimyharape pokzitsikinaha zeka Deus harere tsipinymyryziunaha iwaze ahaspirikporētsa tsimoziknaha. Taparaka Deus harere batu aha ana humo hi Kiristu kino pahahyrinymyryky. <sup>3</sup> Ata zuba Deus myspirikpowy mynatsasoko. Deus tasopyk mynatsasoko. Katsaktsa Kiristu harere bo hȳ tsimykaranahaze wasaniha humo myhyrinymyrytsa.

<sup>4</sup> Iwatahi ababo piwatahaka “Mytsatyziutaha kytsa!” Iwaze ba aty tohi ababo zahaspikhikbata. Siharere wasani mykaranahatsa watsa. Iwatsahi siharere bo ka waby waby byitaha! Pahaspikhikbatakanahaze pahamyikinaha.

<sup>5</sup> Iwatahi utakta ahasoho bo mytsaty mynakara. Utakta ahatuk byitatu ahasoho bo

mytsaty mynakara. Ikiahatsa Kiristu humo ahaspirikporētsa ana humo hi kahyrinymyrēta. Ikiahatsa Kiristu humo ahaspirikporētsa tsimykaranaha iwaha humo kakurēta — my.

*Kiristu tuk tsimyzurukunahaze meky watu tsimoziknaha.*

<sup>6</sup> Ikiahatsa hi:

— Sesus imysapyrēnikita. Iharere bo zuba hȳ tsimykaranaha — tsimaha. Iwaze iharere bo zuba hȳ tynakaranahaktsa! <sup>7</sup> Hwi jobonitakta iharatatsa wytyk zihiboani tahasapynaha niy. Katsaktsa hwi watsa Sesus humo myspirikporētsa iwatsahi mypunihikrētsa tsimoziknaha. Iwatsahi ihumo tsimyspirikpotohinahaktsa! Nawa isoho tsinymyrykynaha ana ty hi tsimyzurukunaha. Deus myzo bo tsimypamykysokonaha:

— O myzo ikia zuba tsamysapyrēta. Ikia humo ka mykurētsa — tsimykaranaha.

<sup>8</sup> O kytsa pykyhytutaha! Sesus soho humo mytsatyziutahaktsa. Ustsa kytsa hi:

— Sesus harere bo batu h̄y — zikaha. Asa hi ihumo batu sispirikpo. Siharere bo ka waby waby byitaha. Ikiahatsa siharere bo yh̄ tsimykaranaha zeka pahaspihikbatakanaha asahi Deus harere bo batu h̄y mykaranaha. Myzotsa siakbatsa harere humo zuba pahahyrinymyrykynaha. Siharere ty pahaspihikbatakanaha ababo mybarapetu mykaranaha. <sup>9</sup> Kiristu Deus wata. Sesus mybarawy bo inasikze nimyhyrinymyryky. Nawa haty Deus mykara anatyhi nimyhyrinymyryky. Kiristu mytukze zikzurukuze astsatu Deus niy. Kiristu bo tsikozonahaze Deus soho humo tsinymyrykynaha. Kiristu Deus wata anahumo

hi Deus soho tsinymyrykynaha. <sup>10</sup> Kiristu harere bo hyŷ tsimykaranaha zeka Deus tazikwy ty mybo nyny my. Mymysapyrētsa tsimoziknaha. Kiristu imysapyrēnikita atahi abazubata my. Bijoikpe iknyktsitsa Deus tsumuēhītsitsa iharere bo hyŷ mykaranaha. Hyrikoso sapybara Satanas tsumuēhītsitsa iharere bo hyŷ mykaranaha.

<sup>11</sup> Kiristu tazikwy ty mybo nyny mykara. Tazikwy humo ahamysapybyitsa tsikykaranaha anahi tsimoewynaha. Deus nimyokzo iwatsahi ihumo tsimynapykyknaha. Mekywatu mytsaty tsimykaranaha Deus humo zuba meky watu tsimoziknaha. Sudeutsa tahanury humo tahapiakzyzyknaha iwa meky watu nikaranaha. Siwatahawy humo Deus okzekha meky watu niyziknaha. Katsaktsa niwahabyitsa. Deus hi mybo nimywatawy iwaze ihumo meky watu mytsaty tsimykaranaha iokzekha metutu tsimykaranaha. Iwaze mynury humo batu mytywataha. Katsaktsa Sesus tuk tsimynapykyryknaha ana humo hi ahamysapyrētsa tsimoziknaha.

<sup>12</sup> Kytsa nimyharasusukunahaze moranahaze mymyhatoto nahaze kywa Kiristu nury nitsahoroknahaze kywahi. Deus Sesus izihyrizikpowy ikiahatsa kino niwatihi tsinahyrizikpobanaha Kiristu watsa, Deus zikwy humo meky watu mytsaty tsimykaranaha ahamysapyrētsa tsimoziknaha. Deus Sesus Kiristu izihyrizikpowy ana hi sizikwy atsatu. Ata bo hi hyŷ tsimykaranaha zeka ahamysapyrētsa tsimoziknaha.

<sup>13</sup> Taparaka ikiahatsa siakbatsa watsa. Deus

harere bo yh̄y ahabyitsa ziknakaranaha. Moises harere bo yh̄y ahabyitsa ziknakaranaha. Ahamysapybyitsa tsikykaranaha. Abaka Deus humo meky watu tsimoziknaha. Hawa Kiristu mytsaty mykara ikiahatsa kino niwatihi mytsaty tsimykaranaha. Ahamysapybyitsa tsikykaranaha humo nimyokzohik. <sup>14</sup> Deus harere humo tsikspirkponaha ka iharere katsa myhumo tsihokdaharēna iwatsahi ma ahabyitsa ziknakaranaha, iharere ty waby byizeka ana humo hi tsihyrinymyrēta. Iwaze Kiristu iharapatawyhyta humo nihyrikosokdaze iwatahi Deus mysapybyi humo nimyokzohik. Ana humo hi nispirktsokda baba mysapybyi zipykbaik. Hawa kytса namy zibykykspyknaha bykyze tysirezo tsikaha, batu amy tohi ty zikaha. Iwaze astatu Sesus mysapybyitsa tu tsikykaranaha humo iwahatu niokzo. Abaka ba zikzisirezonaha tsizubarēna nepykba.

<sup>15</sup> Kiristu hiba Satanas hyrikoso sapybara pehakatsa zikwy imysapybara zepykbaik. Iharapatawyhyta humo nihyrikosokdaze Satanas hyrikoso sapybara pehakatsa zikwy imysapybara zepykbaik. Iwaze myzubaha iwa zihyrinymrykynaha iwatsahi sisikpybyrētsa niyziknaha. Sesus ipunihikanikita ipokso sisikpybyrētsa nikaranaha.

<sup>16</sup> Kytса pahakzo zeka:

— O kytса ana disahawy ty ka hauk hauk ahabyitaha. Ahaokpuwy ty ka tsō tsō byitaha! Nawa puruze tarabaja byitaha! Byzoje iokpezubakata mynayzikze tsikahamyikahanahaktsa sabado eze mybyrywy zuba iwaze tarabaja tarabaja byitaha!

— mykaranaha. Iwa motsasokonaha zeka siharere bo waby waby byitaha.

<sup>17</sup> Tapara Kiristu izumuze siharere bo yhŷ tsikykaranaha. Hawa ebuhuka bo iktsa tsimahaze anaka bamytohi, iwaze siharere ebuhuka hyrity waha Kiristu harere baba zuba my. Abaka Kiristu izumu iwatsahi siharere bo batu hŷ tsimykaranaha Kiristu harere bo zuba ma tsimykaranaha. <sup>18</sup> Asahi pahasapybyi tsihikiknahaze hi:

— Myharere bo yhŷ habyi zeka Deus sinini ykarawy bo pahapeha. Deus okzeka batu ahamysapy — mybarapetu mykaranaha. Siharere bo batu waby zikaha! Asa hi:

— Katsa zuba myhydrinymyrêtsa babatsa — mybarapetu mykaranaha. — Mytsotospyk eze Deus bo tsikozonaha tsimykaranaha — mybarapetu mykaranaha. Hauk byize kytsa hi:

— O asaktsa simyharerewabryrêtsa — maha niwahi mozihikiknaha. Bijoikpe iknyktsa Deus tsumuēh̄itsitsa bo iktsazuba maha. Hawa Deus bo tsimysakibazikiknaha asahi astsatu bijoikpe iknyktsitsa bo maha. Hawa mozihikiknaha zuba ana hi mykaranaha. Kytsa watsa mytsaty mykaranaha iwatsahi siharere batu ahawabyhy.

<sup>19</sup> Abaka asahi Sesus Kiristu humo batu sispirikpo. Hawa imysapybara ty mytsaty mykaranaha. Simysapybyitsa pahamyi tsihikiknaha. Kiristu myharek wata. Ituktsa inury watsa. Mynury humo tsimynapykyknahaze iwa Deus humo mozihikik. Tsimymypuhrynahaze mypaikrêtsa tsimoziknaha. Nawa tatu Deus zikwy humo wasani mytsaty tsimykaranaha ihumo hi

zuba myspirikporētsa tsimoziknaha Kiristu humo  
zuba mytsaty tsimykaranaha.

*Katsaktsa mymysapybyitsa tsikykaranaha  
Deus nimyokzo. Kiristu mysapyzeky  
nihyrikosokda. Abaka Kiristu tuk meky watu  
mysopyk tsimaha.*

<sup>20</sup> Katsaktsa mysapybyitsa tsikykaranaha ana hi tsimoewynaha. Tsikykbakanahaze ba mytsaty zikaha anawahi katsaktsa Kiristu harere bo hȳ tsimynakaranaha, mysapybyitsa tsikykaranaha Kiristu zikwy humo tsimoewykynaha. Iwatsahi hyrikoso sapybara perytsa Satanas harere humo batu mykparawy. Iharere bo batu h̄y tsimykaranaha. Kytsa mysimiwynahatsa ahape maha: <sup>21</sup> — Ikiahatsa na ahadisahawy my zeka hauk hauk ahabyitaha! Tumy humo kino niwatihi tsō tsō byitaha. Ahanamy humo ka paik paik byitaha! — mykaranaha. Siharere bo batu h̄y tsimaha.

<sup>22</sup> Disahawy soho humo ba h̄y ahasopyk. Mydisahawy tsipihauknaha zeka kyze ity tsipikaranaha. Mynamyhuhuk zeka moryryba. Asaktsa Deus mymyhyrinymyryky nahatsa batu tyso zikaha, hawa mytsaty mykaranaha zuba ana humo hi mymyhyrinymyryky tsihikiknaha.

<sup>23</sup> Kytsa sisopyk zubaha siharere piwabykyna-haze mytsaty mykaranaha:

— O asaktsa ja sihyrinymyrētsa babatsa — mytsaty ahabyitsa mykaranaha. Sihyrinymyrētsa hyritywatsa asaktsa mybarapetu nikaranaha. Zimyikinaha. Kytsa asatu tahamyitsapryrikinaha

zeka Deus harere bo batu hŷ mykaranaha. Kytsa tih:

— Bijoikpe iknyktsa Deus tsumuēh̄tsitsa bo tsimysakibazikiknaha — maha. Iwa Deus harere bo batu hŷ zikaha. Asahi:

— O Deus katsaktsa ikia zuba mykparawy. Tsizubarēna ty abo nyny tsimaha — mybarapetu mykaranaha. Siharere ba zikmytsumuēh̄. Batu isapy. Imysapybara ty tymoewy ahabyizeka ba ziksitsumuēh̄. Zimyihikiknaha iwatsahi batu simysapy nikaranaha.

### 3

<sup>1</sup> Ikiahatsa kino tsiknahyrizikponahatsa watsa iwatsahi Sesus tuk tyzurukunahaktsa kytsa! Sesus harere bo zuba hyŷ tynakaranahaktsa! Sesus Kiristu Deus wata my, atahi Deus tuk mynadyhyky siharere bo zuba hyŷ tynakaranahaktsa!

<sup>2</sup> Sibo bijoikpe bo mytsaty tynakaranahaktsa. Hawa mynakaranaha bo hi mytsaty tsimykaranaha. Hawa Deus ahatsyhyryze mykara ana soho humo hi mytsaty tsimykaranaha. <sup>3</sup> Ikiahatsaktsa siakbatsa watsa. Tapara kytsa harere bo yhŷ ziknakaranaha. Abaka batu. Kiristu harere bo zuba ma tsinakaranaha. Atahi bijoikpe eze mynapykyryk. Deus tuk atatu my, iwatahi Deus hyrikoso mytuk mynapykyryk. Asaktsa Sesus harere bo batu ma zikaha batu sihyrinymyry iwatsahi batu sispirikpo. <sup>4</sup> Ikiahatsa hi ahamysapyrētsa tsimoziknaha. Kiristu humo mekywa tu tsimoziknaha. Iharere bo zuba ma tynakaranaha.

Iwatahi ata kino mybarawy bo myziksizoze ikiahatsa ituk tsimyzahakahazonaha. Kiristu humo ahamysapyrētsa tsimoziknaha. Atahi isopykziuhanikita my.

*Taparaka mysopykwyl. Abaka Sesus sopykwyl ezytyk ty tsinakaranaha iwa Kiristu tuk tsimyzurukunaha.*

<sup>5</sup> Ikiahatsa ahamysapybyity ziknakaranaha bo yh̄ yh̄ ahabyitahaktsa! Imysapybara ahamyzihik zeka awatutaha. Ustsa kytsa okeza ty ka hua hua byitaha. Kytsa wytykyryk mysioktyhyryknaha zeka myi myi byitaha ahasopyksapyhu ja. Makutsa ba zikarapewonaha. Ahabo zuba mytsaty mytsaty byitaha. Ahazokdi byihuja! Sizokdirētsa kytsa deusbyitsa pe yh̄ sisopyk watsa maha. <sup>6</sup> Ikiahatsa ana ty hi tsimykaranaha zeka Deus aha humo takyri. Ikiahatsa anatyhi ahasopykze Deus ahahumo takyri iharere bo batu h̄y zikaha.

<sup>7</sup> Taparaka ikiahatsa kino iwa zikzurukunaha. Ikiahatsa tsimyikiknaha ana humo zuba mytsaty tsikykaranaha.

<sup>8</sup> Abaka mekywatutaha! Ahamysapybyri tsimoewynaha. Ahaokani byihuja! Ahamysapy byihuja. Ahaharerewabymybara byihuja. Ahasakpare byihuja! Kytsa humo ka ahasakimyija byihu.

<sup>9-10</sup> Taparaka ahamysapybyitsa tsikykaranaha. Abaka Kiristu humo ahaspirikporētsa mekywa tu tsimoziknaha. Abaka Kiristu wata tsimoziktohinaha iwaze Deus soho humo ahahyrinymyrētsa babatsa tsimoziknaha. Iwatsahi ahape ty spihikbata spihikbata byitaha!  
<sup>11</sup> Kiristu humo mekywa tu tsimaha, Sudeustsa

Sudeutsabyitsa iwa Deus okzeka astsatu. Kytsa asahi sipiakzyzyktsa sipiakzyzykbyitsa Deus okzeka astsatu. Bipyritsa sihyrinymyrybyitsa, sitsumuēhītsitsa siokyryssarobyitsa asa kino Deus okzeka astsatu. Asaktsa Kiristu harere bo zuba ma mykaranaha. Ana bo hi zuba mytsaty tsimykaranaha. Iwaze Kiristu abazubata niyzik.

<sup>12</sup> Katsaktsa Sesus harere bo ma tsimykaranaha ana humo hi meky watu tsimoziknaha. Deus myhumo tsimypokzitsiarēta babata iwatahi nimywatawy ityryktsa tsimoziknaha. Iokzeka wasani tsimaha. Mysapybyi ty tsimykaranaha zeka Deus mybo iktsa myze Sesus humo mymyokzhik iwatsahi tyharape pokzitsikinahaktsa! Tyharape sahikhnaha. — Uta zuba kahyrinymyrēta — ba ziky ustsa kytsa harere bo wabytaha! Ahamyzihikrētsa iwaze ustsa harere tsipiwaby-naha. Ahakubyrisorokuja!

<sup>13</sup> Hawa hatsa kytsa pahasapybyikinaha zeka tysipokzitsinaha. Simymyijanikitsa tysipokzitsinaha. Ba sihumo ahaskpare. Ahakubyrisorokuja! Ahamysapybara ty tsikykaranaha ana hi Kiristu zahaokzo iwatsahi kytsa pahasapybyikinaha zeka tysiokzonaha awatutaha mytsaty mytsaty byijataha tysipokzitsinaha iwaze Kiristu watsa tsimoziknaha. <sup>14</sup> Iwa tsimyzurukunaha zeka wasani tsimaha. Tyharape pokzitsikinahaktsa! Iwa tsimyzurukunaha zeka wasani my. Atsezubaha tsimypykyryknaha zeka ahakurētsa. Astsatu mytsaty tsimykaranaha. <sup>15</sup> Kiristu zuba pahakusukniki iwatsahi astsa botu mytsaty tsimykaranaha. Ikiahatsa hi:

— O Kiristu tymtsumuēhīkta. Iwaze myhyrinymyrētsa babatsa tsimoziknaha. Katsaktsa Kiristu humo atsa botu mytsaty tsimykaranaha — tsimaha. Ana humo hi Deus nimywatawyhik. Iwatsahi Deus bo tsimypamykysokonaha:

— O myzo ikia zuba tsamysapyrēta. Ikia humo ka mykurētsa — tsimykaranaha. <sup>16</sup> Deus wasania ty Kiristu soho humo tyzurukunahaktsa! Kiristu wasaniha humo tyharape hyrinymyrynhaha. Iwaze myhyrinymyrētsa babatsa tsimoziknaha. Iwaze Deus hyrikoso humo tysakibazikiknahaktsa! Deus harere ty tysakibazikiknahaktsa! Ikiahatsa hi:

— O Deus myzo ikia zuba tsamysapyrēta — iwa tsimysakibazikiknahaze. <sup>17</sup> Iwatsahi nawa ha ty tsimykaranaha zeka ana hi Jesus tuktsa pokzi tsimykaranaha. Nawa ha ty tsimytsasokonaha zeka ana hi Jesus pokzi tsimykaranaha. Iwaha hi Deus mozihikik atsatu tsimykaranaha. Deus bo tsimypamykysoikiknaha:

— O Deus myzo tsamysapyrēta. Jesus mysapyzeky nihyrikosokda iwatahi tsamysapyrēta — tsimykaranaha.

*Abaka Kiristu humo ahamysapyrētsa tsimoziknaha iwaze wasania ty tsimyzurukunaha.*

<sup>18</sup> — O wytykyryk sipytsakaza ahapytsa harere bo yh̄y tynakaranaha. Ikiahaka Jesus tuk tsiza iwazahi ahapytsa harere bo yh̄y tynakaranaha. Iwa zeka wasani my — my.

<sup>19</sup> Makutsa pe my — O kytsa ahaokeza humo ahamypokzitsihuktsa. Ba sihumo ahaskpare.

Tysipokzitsikinaha. Iwa zeka wasani my — mykara.

**20** — O ahahyrytsa kino niwatihi. Ikiahatsa ahazotsa harere bo ma tynakaranaha iwaha hi Deus mozihikik. Sesus tuktsa humo ahazotsa harere bo hyŷ tynakaranaha. Iwa zeka wasani my — mykara.

**21** — O sizotsa ahahyrytsa iwastuhu hatyty ty-nasipehakanaha. Tsimysibetsakikiknaha zeka siakubyitsa moziknaha — mykara.

**22** — O sitsumuēhītsitsa siokyrysarobyikitsa. Tyzibyituhukutunaha azihitsa harere bo zuba hyŷ tynakaranaha. Iwaze “O ikia wasani tsimy” my, ana hi tsiwaby tsihikiknaha. Siharere eze zuba ba tarabajaziu zikaha. Sesus pokzi ahahyriziktsokzawy pykyhytutaha! Tarabajaziu tsimykaranaha humo tyzibyituhukutu naha. Azihitsa pahasukparaka zeka tarabajaziu tsimykaranaha. Azihitsa ahaty sukparabyize kino niwatihi tarabajaziu tsimykaranaha hŷ. Iwa zeka wasani my — mykara. **23** Ahahyriziktsokzawy humo. Ahakubyrisorokoktsa. Ikiahatsa azihitsa tsyhyryze tarabaja tsimykaranaha hŷ. Deus humo kino niwatihi itsyhyryze tatsumuēhīkī tsimykaranaha ana humo kino mytsatyziu tsimaha. Iwatsahi ipokzi tarabajaziu tsimykaranaha.

**24** Kiristu mypehakatsa babata my, ikia ituk hi tarabajaziu tsimykaranaha. Atahi isapyrēnikia ty mybo nyny my. Iwatsahi tarabajaziu tsimykaranaha zeka hawa ihuak ty mybo nyny my. **25** Katsa hi tamyi zeka sinini tsimykaranaha.

Deus babata zuba mysoho humo tsihyrinymyrēta amy ty mysoho motsasoko wasani my. Iwa h̄y.

## 4

<sup>1</sup> — O sitsihitsitsa ahatsumuēhītsitsa asahi batu siokyrysaro humo nyny hukbyikitsa asa humo hi wasani tahaktsa! Tysisakihihnahaktsa! Mytsatyziutaha! Ikiahatsa humo kino ahapehakatsa bijoikpe ezekta my. Atahi pahapokzitsiki ikiahatsa kino niwatihi tsimaha, ahatsumuēhītsitsa tysipokzitsikinaha — my.

### *Myspirikpowy.*

<sup>2</sup> O kytsa Sesus tuktsa Deus bo tynapamykysoikiknahaktsa. Ahazikabyihuktsa Deus bo tsimypamykysonahaze wabyziutaha! Ikiahatsa hi:

— O Deus ikia humo ka mykurētsa — tsimynakaranaha. <sup>3</sup> Deus bo tsinapamykysokonahaze katsa mybo kino tsimyzapykynaha. Katsaktsa Deus wasania ty tsimytsasokonahaze kytsa ba zikmykninaha ana humo hi tsimyzapyky tsihikiknaha. Taparaka Deus wasania ty Kiristu soho ty myzubaha bo batu tyso, abaka myzubaha bo wasaniha mybo motsasoko katsa eze tu tsimyt-saso tsihikiknaha h̄y. Ikiahatsa Deus bo mytsyhryze typamykysonahaktsa. Deus harere humo zuba ikykara tahi sakyriukrēnikitsa hurukwy bo zikoktyhyryknaha. <sup>4</sup> Iwatsahi Deus bo tsimypamykysonahaze tsimyzapykykynaha:

— O myzo Pauro tuktsa tysitsumuēhī. Wasani mypubara ty motsasoziukunaha iwatsahi kytsa iharere piwabytoktokonaha — tsimaha. Iwa tahaktsa.

<sup>5</sup> Kytsa Sesus humo sispirikpobyitsa wasani taha. Ahaspirikpohuktsa ana hi pinyaha. Iwaze Sesus soho sibo tytsasonaha. <sup>6</sup> Kytsa bo tsimypamykysokonahaze ahaharere tisapyrēna tsimaha. Kytsa ahaharere wasaniha humo siakparawy my. Iwaze piwabytoktonahaze. Ahaharere piwabynahaze — O siharere humo mykurētsa. Wasani my. Tahawaby tsihikik — maha.

*Abaka pepykyk iwatahi mytukytsa bo mytsaty mykara.*

<sup>7</sup> Tikiko kasoho ababo motsasoko. Atakta Sesus harere bo hyŷ mynakara tahi atakta katsy wata. Atakta kakparawy, mytuk Sesus soho humo mymytsumueh̄ekik. Sesus tsumueh̄itsa babata my. <sup>8</sup> Iwatahi ababo pipeha. Mysoho motsasokoze ahakurētsa tsimoziknaha. Hawa tsimyzurukunahaze anahi motsasoze pahakusukniwyky hŷ. Wasani my.

<sup>9</sup> Onesimu Tikiko tuk mokuru. Ata kino niwatihi Sesus harere bo hyŷ mynakara iwatahi ihumo tispirikporēta. Wasani mozuruku. Katsaktsa ihumo mypokzitsirētsa. Atakta Korose ezekta my. Hawa tsimykaranaha ababo motsasonaha.

<sup>10</sup> Aristarakus katuk sakyriukrēnikitsa hurukwy eze mopykyryk. Atahi:

— O Korose ezektsa humo kahyrizikbarēta mykara — niy. Marakos kino niwatihi ahahumo tsihyrizikbarēta, atahi Baranabe tsy. Isoho botu ziwatahaka ababo pomo zeka ipe tsimaha:

— O pakutynykta! Kawahoro humo awanu ty häitykta. Mytuk tsikadisaha! — tsimaha. <sup>11</sup> Sosue atsatu Sustas inarokota kino niwatihi ikiahatsa

humo tsihyrizikbarēta. Ata kino Sudeu. Harakyk-byi Sudeutsa asaktsa katuk Sesus humo myzit-sumuēhīkīnaha. Kytsa Sesus humo sispirikporētsa ana humo hi tarabaja mykaranaha. Iwatahi kakurēta. Ziktsumuēhīkīnaha humo kakurēta hŷ.

<sup>12</sup> Epaparas Sesus tsumuēhītsa niwatihi. Atakta ahudikhudikwy ezekta my ahahumo tsihyrizikbarēta. Atahi Sesus harere bo hyŷ mynakara. Deus bo ahatsyhyryze mynapamykysoko. Atahi:

— O Deus myzo Korose ezektsa tysipunihiwyky iwatsahi Sesus humo batu sisikpyby. Asaktsa Sesus harere bo hyŷ mynakaranaha iwatsahi ihumo sispirikporētsa. Sispirikporētsaze Sesus humo mospirikpotohinaha — my. <sup>13</sup> Atakta ahatsyhyryze tarabajaziu mykara ana humo hi kahyrinymyrēta. Kytsa Raodisija ezektsa, Hieraporis ezektsa iwatsa sizubarētsa tsyhyryze tarabajaziu mykara. Wasani mykara.

<sup>14</sup> Rukas mediko mozororowykytsa katsaktsa ihumo mypokzitsirētsa. Atakta simyitsapyritsa nasipokzitsiki. Atakta Demas tuk aha humo sihyrizikbarētsa, ahasoho bo mytsaty mynakaranaha.

<sup>15</sup> Katsa ustsa Sesus tuktsa humo myhyrizikbarētsa. Asaktsa Raodisija ezektsa. Ninapa bo asaktsa iwahoro eze ziknapykyknaha asa humo hi myhyrizikbarētsa.

<sup>16</sup> Kyze papeu iwatahaha tsipinynahaze Raodisija ezektsa bo nyny tsimaha. Iwaze Raodisija ezektsa kino niwatihi tsipinynaha. Utakta usa papeu sibo iwatahaka ana hi kytsa zibykyryknaha.

Asahi anapapeu ty ababo nyny maha. Iwaze papapeu zisapyzikynaha. Sipapeu iwatahaha tsipiny-naha. <sup>17</sup> Arakipus pe tsimaha:

— O Arakipus mypehakatsa Sesus hyriziktsokzawy humo zipeha. Anaty tsimykta — tsimaha.

<sup>18</sup> Abaka utatu piwatahaka, *Pauro ahahumo tsihyrizikbarēta mykara* ana kino piwatahaka. Deus bo katsyhyryze tsimypamykysokonaha. Siakyriukrēnikitsa hurukwy ezektatu mykara. Kahumo ahaspiriktsokdabyihu!

*Deus pahasapywyky.*

Deus bo uta kino ahatsyhyryze mopamykysō:

— O Deus myzo Korose ezektsa tysipokzitsi — my. Iwa. Niwazuba.

Pauro

## **Deus Harere Aibaky Sesus mymyspirikpoko naha**

### **New Testament in Rikbaktsa (BR:rkb:Rikbaktsa)**

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Rikbaktsa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
2f0260ea-5969-5180-9ac5-183d63a989f1